

經義考

冊八

經義考卷五十四

秀水 朱彝尊 編

男 昆田 校

易五十三

徐氏體乾周易不我解

六卷

闕

體乾自序曰楊龜山有云由漢魏以來以易名者殆數千百人予乃徧求之得五百餘家皆無當孔子之義至京口靈峯陳氏授以青山易半卷希旦易一卷覽其辭闡揚十翼率以天象言易言約而旨深遂以一圖懸諸室久之三垣七耀若指諸掌夫星辰體附於地精耀於天凡地之一切有形天皆有象人變其常象卽有以示之於先聖人觀象畫卦辨時敘事欲親萬民先時示勸舍此何從焉故曰天垂象見吉凶聖人象之易義悉矣輒不自量爲書六卷纖毫不敢以我與也故定其名曰周易不我解解不以我寧不可證之斯人哉萬曆庚戌陽生月

黃百家曰徐體乾字行健長淮衛人嘉靖癸未進士其易學自言

本陳希旦趙青山用天星配四時謂法象莫大乎天地變通莫大乎四時卦爻不合天文不配四時則孔子繫辭皆無著落故其詮乾龍云春秋傳土功龍見而畢務言九十月之交龍星朝見于東方而農人土功之務畢矣

梓慎曰龍宋鄭之星也魏獻子問龍于蔡墨蔡墨曰周易有之在乾之垢曰潛龍勿用坤之剝曰龍戰于野若不朝夕見誰能物之左氏言周易實以星爲龍矣龍非星豈得朝夕見乎史云杓攜龍角角在斗前爲蒼龍之首杓建子丑龍亦旋于子丑之下隱而未見故曰潛龍勿用杓建寅卯龍亦躍于寅卯之方實在天淵之分故曰或躍在淵杓建辰巳龍亦見于辰巳之方懸于天田星下故曰見龍在田杓建午未龍適當中天之上故曰飛龍在天杓建申酉龍夕惕于西南故曰夕惕若杓建戌亥龍朝見于東北晝晦其形故曰亢龍有悔按此而知履之虎尾遯之尾晉之角姤之角中孚之翰音俱取象于星可以類而推矣其說具有神解是編流傳者寡余家止存乾坤一卷後五卷訪之不得惜非完書矣

李氏舜臣愚谷易解

未見

易卦辱言

一卷

存

舜臣自序曰唐初考定易注惟存王輔嗣易吉凶悔吝僉曰吉善也凶羞也輔嗣或曰吝恨辱也則恨辱云或得今吾卦數言存豈不辱哉然而自不可已勉吾於易讀也卦各一首惟坤二首明夷五首

姓譜舜臣字懋欽一字夢虞樂安人嘉靖癸未進士官至太僕寺卿

潘公恩周易輯義

三卷

未見

公自序曰唐李鼎祚集虞翻荀爽等三十餘家刊輔嗣之文補康成之象昔儒有云隋唐以前易家諸書逸不復傳賴李氏集解猶見一二然則古易師諸說胡可廢哉予潛心易學取古今人之論著反覆攷觀因憶昔儒吳立夫之論易云談理致者多溺於空虛

守象數者或流於讖緯乃以斯語定爲折衷去浮文存本實芟煩
雜略玄虛錄其發明象義有裨經學者彙集成編一得之愚偶有
見聞不揆淺陋亦以附入名曰緝義說文緝者繼也續也亦叶也
謂其繼續前聞叶和易義云耳錄藏家塾朝夕覽觀思繇潔靜精
微之教以造致用崇德之階未能也貽示同志勸就正焉

人物考恩字子仁上海人嘉靖癸未進士歷官南京工部尙書改
都察院左都御史贈太子少保諡恭定

李氏義壯周易或問

未見

義壯自序曰天下之道正而已矣天下之正中而已矣中正也者
所以貫天下之道也易也者易也隨時變易以從道也道也者中
正之謂也古今之學易者率皆以陰陽各得其位爲正而二五爲
中一三四六則非中也陽而之陰陰而之陽則非正也噫嘻其然
豈其然哉夫進退存亡位不同也吉凶悔吝時不同也盈虛消息
道不同也膠於道則有病於時膠於時則有病於位膠於位則有
病於易故聖人精義致用變通隨時凡求其所謂中正者從之而
已不然其何以爲易哉予嘗有志於此沉潛反覆四十餘年而未

之有得一日讀至小畜卦一道也彖又一道也象一道也爻又一道也恍然若有悟焉然後知孔子之易非周公之易非文王之易文王之易非伏羲之易數聖人者其所以爲天下後世慮其將各有攸當乎故讀伏羲者如未嘗知有文王也讀文王者如未嘗知有周公也讀周公者如未嘗知有孔子也此善學易者也彼不知者乃欲求中正於二五陰陽之間則其執一亦甚矣其又何以爲易哉故曰所惡執一者爲其賊道也舉一而廢百也間嘗執此求之天下不姍笑而置疑者亦鮮矣未有脫然以爲是者乃退而求諸先儒之緒言或有契焉積之歲月類以成書其間微辭隱義訓釋明備可以擴四聖所未發者亦并從而錄之惟求以極斯理之所至盡吾心之所知以不背於中正之歸則已他非所敢知也

葉氏

夏珮周易義叢

十六卷

存

夏珮自序曰自漢至今專門易學不啻百有餘家或傳象數或明義理或推之互體卦變五行求其真有以見天下之蹟之動得四

聖人所不傳之秘者什無二三焉乃於百有餘家內摘取精要者彙爲是編仍以子朱子本義冠之端首蓋以其兼明象占故也至若程傳則備書而不敢有所刪節釐爲若干卷僭不自量輒綴測語附之章末名曰周易義叢用傳同好聊備千慮一得之採擇云
嘉靖二十六年秋九月

台州府志葉良珮字敬之浙江太平人嘉靖癸未進士仕止刑部郎中

豐氏坊古易世學

十五卷

存

易辨

一卷

存

錢謙益曰豐坊字存禮鄞縣人嘉靖二年進士除禮部主事以吏議免官家居坐法竄吳中改名道生字人翁年老貧病以死存禮高才博學下筆數千言立就於十三經皆別爲訓詁鉤新索異每托名古本或外國本今所傳石經大學子貢詩傳皆其僞撰也

陸元輔曰豐氏古易世學本坊一人所作而僞托於遠祖稷曾祖慶父熙而以己承其學真狂易者所爲也

按豐坊易辨以孔子授易於商瞿故其說文言傳凡云何謂也言是瞿所問凡云子曰則夫子答之之辭

蔡氏潤宗易學正言

未見

閩書蔡潤宗字克昌晉江人嘉靖乙酉舉人除餘杭知縣以易學正言教士

陳氏深周易然疑

佚

長興縣志陳深字子淵嘉靖乙酉舉人知歸州調荊門

蔣氏經易經講義

佚

兩浙名賢錄蔣經字引之開化人嘉靖乙酉領鄉薦知昌平州

鄒氏守愚易釋義

未見

黃虞稷曰守愚莆田人嘉靖丙戌進士

唐氏樞易修墨守

一卷

存

陸元輔曰唐樞字子鎮歸安人嘉靖丙戌進士官刑部主事易修墨守一卷王思宗序之

劉氏邦采易蘊

二篇

未見

黃虞稷曰邦采字君亮南昌人嘉靖戊子舉人官嘉興府同知從學王陽明

鄭氏守道易解

未見

閩書鄭守道字用行福州人嘉靖戊子舉人嘗主白鹿洞教事著太極圖說并易乾坤上下繫辭解能闡周程之秘知夏津縣遷徽州府通判

羅氏洪先易解

一卷

存

范路曰羅洪先字達夫吉水人嘉靖己丑賜進士第一除翰林修撰以言事削籍爲民學者稱念菴先生隆慶元年詔贈光祿卿諡文恭

楊氏爵周易辨錄

四卷

存

爵自序曰予久蒙幽繫自以負罪深重憂患驚惕之念卽夙夜而恆存也困病中日讀周易以自遣或有所得筆之以備遺忘歲月既久六十四卦之說略具矣因名曰周易辨錄繫曰困德之辨也吾以驗吾心之所安力之所勝何如耳若以爲實有所見而求法於古人焉則吾死罪之餘萬萬所不敢也時嘉靖二十四年乙巳九月

姓譜爵字伯修富平人嘉靖己丑進士歷御史直言下獄釋爲民隆慶元年贈大理丞

林氏性之易經淺說

未見

人物考林性之字師吾晉江人嘉靖己丑進士官南京戶部廣西司郎中

薛氏甲易象大旨

八卷

存

張袞序曰古者聖人之作易也與天地準設卦明象觀爻立辭而陰陽之蹟剛柔之變盡矣薛君應登生千載之下有志於聖人之學覃思研精深於易解每卦之下列傳與爻證以文言言必有斷斷必有義或以類求或以出於其類之外錯綜交互而變化行於其中爻以二五爲中爲正有得其時則位皆不當而曰中行曰可貞不得其時則位皆中矣而曰貞凶曰貞厲神而明之時之義大矣薛君讀易十有餘年蚤夜以作食寢與俱始克成編刻而傳之自題曰易象大旨曰象者易所自有非有加也曰大旨者括其諸說讚以微言止以明象而已矣此薛君之志也

人物考薛甲字應登江陰人嘉靖己丑進士歷江西按察副使

黃氏光昇讀易私記

未見

姓譜光昇字明舉晉江人嘉靖己丑進士歷刑部尙書

熊氏過周易象旨決錄

七卷

存

楊慎曰叔仁易象旨一書多以易數爲主而引伸觸類繼絕表微條貫葉分可謂擇之精而語之詳矣

過自序曰易之始終獨有象爾學者猥稱畫前易豈非祇以爲異哉昔者聖人類萬物之情象其物宜物有萬不出陽陰奇偶之畫也是謂儀象故生八卦以象吉凶是故易者象也八卦成列象在其中奚啻天地風雷山澤水火哉卽陰陽消長盛衰之間觀其所乘而吉凶大業莫能違也樸斲風瀉後聖乃廣爲之象以開物開而正名當物因其自然故曰象者像也象有數故曰極其數遂定天下之象象有辭故曰彖者言乎其象聖人設卦觀象繫辭焉是數與辭皆出於象也辭有吉凶悔吝皆謂之象吉凶者得失之象也悔吝者憂虞之象也彖爻所同也四者不爲象而爲占何其不察聖人之言耶其所謂變化者進退之象也其所謂剛柔者晝夜之象也爻所獨也異哉後世之說曰此爲象此爲占旣又曰戒占

嘻亦已支矣或又曰此爲意此爲言爲象爲數豈不益甚哉昔韓宣子適魯見易象明古統彖爻爲象也居則觀其象而玩其辭居則本卦不變言故曰所居而安者易之象古爲象今爲序繇字誤也動則觀變玩占動謂之卦故曰所變而玩爻之辭亦緣字誤轉變爲樂矣得其不變者則占彖得其變者則占爻辭皆象也象皆占也占皆象也又可分象占哉有不得其說者則曰有占無象象在占中有象無占占在象中嘻支矣是故易非獨言與數其意亦皆生於象而已故得稱象之意象之言象之數書不能盡言言不能盡意立象盡意則辭可略矣今大象旨者猶爲因辭求象之道耳是故有一卦之象有一爻之象自其變者觀剝彖傳曰觀象觀也者觀卦也二陽之卦剝五所自變也一卦論變之例也蒙六五童蒙之吉順以巽也巽者巽卦也五變則上體巽一爻論變之例也在履而當夬位曰夬履在兌而當剝位曰孚剝否九五稱大人與乾同中孚九五稱攣孚與小畜同此四爻者皆曰位正當兼取兩卦相當之例也歸妹以恆用恆之道以初三易位者也乾九四乾之小畜小畜之中又有兌離故曰革是變之又變也萃六三上巽三五互一卦之例也泰六五歸妹中四爻互二體之例也雜物

撰德非其中爻不備之謂也於是而正名百物亦足矣商瞿始受易孔子瞿所爲學今卽無知者史稱瞿後有數家皆以象數爲宗而王同始爲書丁寬服生皆著象數篇亦以費氏廢矣惜哉王弼尙名理隋興遂爲中原師邢恕等益欲忘卦棄畫王濟有言弼所誤者多何能頓廢先儒濟言是矣然本先儒自淮南九師虞荀崔陸之徒煩瑣猥曲億而時獲非能盡合卦爻陰陽之義顏氏庭誥乃云馬陸得其象數此亦耳食何異李鼎祚集解及釋文詩二禮春秋義疏後漢書文選注康成說往往散見朱子發郭子和丁易東吳幼清及道者流周易鈎深圖等世多傳有其書皆得失參半黃楚望最後出最以象學自名其言曰古者占筮書卽卦爻取物類象懸虛其義以斷吉凶上古聖神所爲自然之理也立辭者時取以明教九筮法亡筮人所掌者不復可見而象義遂不可復通如楚望言是古未嘗無類例矣今沿辭而求翼說廣八卦之象具在在學者引伸觸類耳雙湖胡氏乃云孔子取八卦象有括文王周公彖爻例者有自括大象例者又有於說卦別取者胡氏於象豈可謂會通於筮人所掌之遺乎若楚望象外之象竊意謂陰陽盛衰卽所乘而生大業者本無言之易蓋今象之源亦時露其微

不欲比同而語使讀者更增塗轍程朱易學官盛行童而習之當
二先生時其爲工力深矣要其舍象非易之全也豈惟非易之全
將使人如燕相說郢書者矣故在讀焉而擇之或云象一定則裁
成何寓哉曰天人一也鄭顓天王乃顓人學徒病之久矣有能類
萬物之情會其源出入以度外內而知懼者是易之道斯其爲
已易也道術裂百家出多緣起於陰陽可推而通易爲無害也者
與始近而未遂遠者亦間附焉以見易蘊猶曰在學者引伸觸類
以辨之耳乃若道器太極說有不同古先者約文申奧據易證焉
庶明達省之有以相發其要不越乎類物之情象其物宜云爾其
升陽子數四則本易外別傳然道貫物我施由身始亦不可廢也
援類例推而麗之共諸里師具訓蒙士有罪我者期其諒只若俟
來今以求知則默而成之非夫古人其孰能獲我心者乎嘉靖辛
亥二月

劉惔曰象旨多聖賢所未發如形而上形而下道器之辨迥異於
古大抵折衷羣言會歸一統

姓譜熊過字叔仁四川富順人嘉靖己丑進士

胡氏經易演義

十八卷

存

張雲章曰經號前岡廬陵人嘉靖己丑進士其說好與朱子異

黃氏中易經記蒙

未見

括蒼彙紀黃中字文卿遂昌人嘉靖辛卯舉人除知鉛山縣入爲御史遷天津兵備副使

董氏燧周易問答

未見

陸元輔曰燧號蓉山撫州人嘉靖辛卯鄉舉歷官刑部郎中師王心齋鄒文莊講學不倦嘗同陳惟濬商訂疑義著周易問答

蔡氏元偉易經聚正

未見

閩書蔡元偉字伯瞻晉江人嘉靖辛卯領鄉薦除知德安縣事遷杭州府通判撫州府同知有四書折衷易經聚正各若干卷

王氏畿大象義述

一卷

存

人物考畿字汝中山陰人學者稱龍谿先生嘉靖壬辰進士歷兵部主事

吳氏悌易說

十卷

未見

曹溶曰悌金谿人嘉靖壬辰進士歷官南京刑部右侍郎

洪氏垣周易玩辭

未見

黃虞稷曰垣婺源人嘉靖壬辰進士

周氏滿易象旨

五卷

未見

楊時喬曰受庵自序言程子傳義精矣獨象未具故說容有出入朱子義既專宗程子而別無所發明又概以占括之而象旨益晦然二先生傳義其說皆正是書以象爲說未有實見皆訓詁之訓

詁也